

esser legne. *Item*, di Verona, à, per uno explorator suo partite questa matina de li, come non vi esser salvo circa 1000 fanti, quali fugeno, e ch' el capitano Rocha Bertin era li con certi pochi homeni d' arme et *similiter* el capitano Tarlatino; qual capitani sono amalati, ma Rocha Bertin sta malissimo. *Item*, ozi, poi disnar, è zonti li in Vicenza cercha 30 fanti ben armati fugiti di Verona, quali hanno portato con sè la loro bandiera etc.

Nota. Sier Silvestro Trun qu. sier Mafio ritenuto per i cai di X, fo colegiado. Tochè il Colegio a sier Marco Donado consier, sier Francesco Bragadin cao di X, sier Marco Loredan avogador di comun, et sier Marco Zorzi inquisitor, et fo poi asolto per il Consejo di X, perchè non era in dolo alcun.

6* *A dì 7, domenega da matina.* Nulla di conto. L'orator yspano, *de more*, in Colegio, e tutti parlavano che francesi vanno a trovar spagnoli. Chi diceva una cossa et chi un'altra; chi diceva li romperano, chi diceva spagnoli reculerano e francesi li seguiria fino a Roma, il Papa fuzirà di Roima. Chi diceva sarano a la zornata e il campo di Spagna s' ingrosserà et li aspeterà. Chi dicea, spagnoli si à portà mal a non seguir francesi, perchè non arebano auto Brexa. Altri dicea, zoè spagnoli è qui, non sono venuti acciò l'acordo con l'Imperador se ultimasse, e non havea il vicerè comission dal suo Re se non aiutar il Papa a aver le terre di la Chiezia; e cussi la briga' stava in questi rasonamenti et malcontenti tuti, perchè vedeano francesi valenti homeni e maestri di guerra. E il modo dil perder di Brexa, ancora non si sapea la verità. Di nostri capi niun mancava, parte mandati a Milan presoni, altri lassati e *continue* veniva qui, e tra li altri vidi ozi il fiol di Antonio de Pii nominato Costanzo, e altri assa', come ho scripto di sopra, *ergo* etc.

Et l'altro zorno, li parenti di sier Andrea Griti procurator comparseno a la Signoria a dimandar monsignor de Ru, overo di la Roxa, borgognon, era capitano zeneral di l'Imperador di le sò zente; ch' è prexon in Toreselle, per contraccambiarlo col dito Griti, perchè questo di qui dice l'Imperador e madama Margarita farà tanto col re di Franza che lo riscuoderà in cambio dil dito Griti; et cussi fo dito per il Colegio, che si meteria la parte in Pregadi.

Di sier Domenego Contarini, andava provedador a Bergamo, qual è ancora a Montagnana, fo letere date eri. Come, per tre fanti presi, erano a Lignago, et examinati con corda, hanno, che francesi, passato Po, voleno andar a trovar il campo di spagnoli et esser a la zornata, et questa

deliberation feno *etiam* avanti andasseno a recuperare Brexa, che, poi recuperata Brexa, andariano contra il campo di Spagna, e, rotto quello, sariano signori dil tutto e dil Reame; e che in Lignago era restà pocha zente; et altre particolarità, si come in dite letere si contiene.

Item, si ave ch' el duca di Ferrara, a dì 4, feva la mostra di le so' zente da cavallo e da piedi per mandarle, *etiam* lui, agumentar il campo di Franza per dar adosso a quel dil Papa e de' spagnoli.

In questa matina si parti de qui alcune bareche armate con Sagramoso Visconte dentro, stato prexon qui, et vano verso Po, dove, si ha, è zonti li nostri zentilhomeni che per lui si contraccambia, et 7 li si farà il contraccambio di qua dil bastion di Crespino, justa l'hordine dato. Li qual zentilhomeni è questi: sier Jacomo Cabriel qu. sier Zuañe, fo prexo podestà et capitano a Civald di Belun, sier Bortolo Dandolo, fo prexo podestà a Roverè di Trento, qu. sier Piero, sier Piero Gradenigo di sier Marin, fo prexo provedador in Moncelese, sier Lodovico Contarini qu. sier Imperial, fo prexo provedador a Vipao, et sier Daniel Moro qu. sier Marin, zà è qui venuto, fo prexo provedador, era in Este, ma in Moncelese vene, e li fu fato prexon. Et questi sopraditi presoni erano zonti a Mantoa justa il contraccambio fato, sichè fin doj zorni sarano di qui: et cussi veneno.

Da poi disnar, fo gran Consejo e fato alcune voxe, e a Liesna, conte, fo tolto sier Zuan Francesco Marzelo fo con 5 homeni a sue spexe a l'asedio di Padoa, qu. sier Fantin, fo 40 zivil, e cazete, nè questo titolo li valse. *Item*, signor di note fo tolto sier Gasparo Zancharuol, fo podestà a Marostega, qu. sier Marco, fo in l'asedio di Padoa con 5 homeni a sue spexe, *etiam* cazete, e non li valse; sichè tal titolo hora mai più non val. *Item*, fo tolto di Pregadi sier Luca Vendramin *dal Banco*, qual si pol dar titolo, ch' è di Pregadi, et non volse, et ave il titolo, fo camerlengo di comun; sichè anche questi che vien per i ducati 1000 in Pregadi comenzano a non si dar il titolo, perchè vedeno esser maltrattati a Consejo.

Fo leto la parte, a noticia de tutti, presa in Pregadi, di quelli è debitori a li provedadori sopra la camera d'imprestidi, pagino, termine zorni 15, *aliter* con pena 10 per cento che prima non pagava con pena; poi, chi ha danari in le man di raxon di vachantie, confiscation etc., quali erano deputati a la sfalcation dil Montenuovo, *etiam* debano in dito termine aver portà quanto dieno dar, soto la pena di furanti, *ut in parte*.